

## Comunicat de premsa dau 17 de mars de 2014

### **Lo Carnavàs de la Plana atacat per la policiaLo Carnavàs de la Plana 2014 es estat una capitada dei bèlas, pasmens s'acabèt dins la violéncia. Perqué ?**

Ja, lo Carnavàs 2013, en plen dins l'annada de la « Capitala Culturala », s'èra fach seguir per una escòrta policiara desproporcionada e per d'empachas a son debanar. Maugrat de provocacions, la fèsta s'èra pasmens facha.

Aquest an, lo dimenche 16 de mars veguèt un passa-carriera mascarad e festiu s'espaçar de la Plana a Noailles puei de Noilles a la Plana. Mai, dau temps que, de retorn sus la plaça, una farandola dansava e cantava a l'entorn dau caramentrant que cremava (coma va vòu la tradicion), lei pompiers pretendeguèron amorçar lo fuec gaujós avans que siegue l'ora e, en fàcia dei protestacions, la policia carguèt. De pichons fuguèron gazats, de peadons bastonats, e doás personas siguèron arrestadas (puei 4 de mai au moment d'un recampament de sostenh davans lo comissariat de Noailles), que seràn puei acusadas d'aguer agarrit lei policiers.

Bastava pasmens que s'aguèsse se laissat comburir lo Caramentrant quauquei minutas de mai per que s'acabe la fèsta dins la bona umor. Mai lei fòrças de l'òrdre provoquèron lo desòrdre, e de segur pas dins l'esperit dau Carnavàs !

Dimars lo 25 de mars, la Ministra en carga de la Cultura vendrà embarnir una mòstra au MuCEM anomenada « Lo mond au revèrs - Carnavàs populars d'Euròpa e de Mediterrànea », que, se ditz, una plaça serà reservada au nòstre Carnavàs... Qunt ironia ! D'aqueu temps, per carriera, dins la vida vidanta, sembla que siegue enebit de festejar Carnavàs.

Ailadonc demandam la liberacion imediata dei sièis carnavaliers destenguts.

E anam engimbrar tre ara lo Carnavàs 2015, que serà un Carnavàs dei Carnavàs, popular e internacionau, que li convidarem nòstres collègas carnavaliers de Dunkerque, Cádiz, Nàpols e Tataoina per ocupar ambe nosautres l'espaci public que se li sente l'esperit de nòstre quartier.

Carnavàs 2014 moriguèt ! Que visque Carnavàs 2015 !

Signat : de carnavaliers

PS : una acampada extraordinària dei carnavaliers es convocada diluns lo 24 de mars dins lei locaus de Marselha Tròp Poderós (MTP), au 30, carriera dei Tres Matges, quartier de la Plana.